

Sistem maklumat harga hasil pertanian diwujudkan

BH - 20/1/2004: 2 Perdana

Oleh Salina Abdullah

SHAH ALAM: Satu sistem maklumat harga hasil dan produk pertanian akan diwujudkan bagi petani dan pemasar supaya hasil keluaran mereka dapat dipasarkan secara lebih berkesan dengan harga berpatutan, kata Datuk Seri Abdullah Ahmad Badawi.

Perdana Menteri berkata, sistem maklumat harga itu akan membantu petani dan pemasar mengetahui harga hasil pertanian di lokasi berbeza dan mengelakkan daripada ditipu orang tengah.

"Kita mesti ada sistem supaya kita tahu berapa harganya supaya tidak ditipu orang tengah. Kita mesti tahu harga di pasar, di Kuala Lumpur, di Pulau Pinang, Singapura barulah kita tahu harga sebenar barang kita.

"Kewujudan sistem maklumat harga itu akan membantu meningkatkan pendapatan masyarakat petani," katanya ketika berucap merasmikan Pasar Tani Mega dan Anugerah Usahawan Pemasar Gemilang 2004 di sini, semalam.

Menjelang lanjut langkah baru itu, Menteri Pertanian dan Industri Asas Tani, Tan Sri Muhyiddin Yassin, berkata sistem maklumat harga hasil pertanian itu akan dibuat secara online.

"Petani dan pemasar yang mengakses maklumat itu akan mempunyai pilihan lokasi untuk menjual produk mereka pada harga lebih menarik.

"Tidak semestinya jual di Pasar Tani, mungkin boleh jual di pasar

biasa di Kuala Selangor atau Sepang sebagai contoh. Ia membantu mereka membuat keputusan untuk ke mana bagi dapatkan harga yang lebih baik," katanya.

Beliau berkata, pada peringkat awal, petani yang tiada kemudahan komputer mungkin sukar untuk mengakses maklumat harga itu tetapi beliau yakin penggunaan akan meluas pada masa depan selaras dengan galakan pemilikan komputer di negara ini.

Muhyiddin juga berkata, portal AgroBazaar akan diintegrasikan dengan sistem teknologi maklumat pertanian bagi membolehkan maklumat pasaran mengenai produk pertanian disebar dengan meluas melalui satu laman web.

Berikutan harga produk pertanian yang tidak menentu, maklumat pasaran pertanian dalam portal itu akan dikemaskini setiap hari.

Pada majlis itu, Perdana Menteri menyampaikan Anugerah Usahawan Pemasar Harapan kepada Dahari Abdullah dari Pasar Tani Kangar, Perlis, Mohamad Azam Ruzali (Pasar Tani Ampangan, Negeri Sembilan) dan Mohamad Sani Awang (Pasar Tani Kuantan, Pahang).

Anugerah Usahawan Pemasar Harapan Wanita dimenangi oleh Bariah Ahmad (Pasar Tani Bukit Mertajam, Pulau Pinang), Masnita Suriati Kamaruddin (pasar Tani Tanjong Malim, Perak) dan Jainilisa Gumong (Pasar Tani Lahad Datu, Sabah).

Setiap pemenang anugerah itu membawa pulang sijil penghargaan, plak dan sijil simpanan premium bernilai RM1,000.



ABDULLAH diiringi Muhyiddin (dua dari kanan) dan Dr Mohamad Khir (tiga dari kanan) melihat hasil tani selepas perasmian Pasar Tani Mega dan Anugerah Usahawan Pemasar Gemilang 2004 di Pasar Tani, Shah Alam, semalam. - Gambar oleh Che Rani Che Din